

下



陸士龍文集卷第一

頌

祭題頌

盛德頌

祖考頌

張二侯頌



榮啓期讚

嘲褚常侍


牛責季友

登遐頌

夫死生存亡二理之已然者也而世有神仙登遐之言千歲不死之壽其詳固難得而精矣列



史陸雲



仙之道作者既集而登遐未有焉莊周有言我
試妄言之子試妄聽之彼之有無蓋難以理求
我之妄聽顧可以言齊之遠為頌云爾

郊問人

王子喬

玄洛

孔仲尼

九疑仙人

大勝山上女

李少君

梅福

張招

左元放

劉根

黃伯巖

費長房

何女子

焦生

鮮卑務塵

韓衆

夷門子

林陽子

任作子

鬼谷子

哉郊問懷寶採薪媚茲伯陽常道是實俯翼
遂周携手入秦遺物執一妙世順神思我玄流
浩若無津王喬淵默遂忘潛輝遺形靈嶽顧景
亡歸靈彼有傳與爾翻雅承雲儵忽飄飄紫微
玄洛妙識飢餌神穎在陰條逝却陽無景道遙
北嶽凌霄引領揮霧昊天合神自靖
孔丘大聖配天弘道風羽玄流思採神寶明發
懷周興言謨老靈魄有行言觀蒼昊清歌先試
丹書有造茫茫九疑登暉太素有漢登聞神具
爾顧發彼靈丘聿來載步贈我則歌永揚遐祚

大勝之娥厥猶翼翼降宮有和納符帝側揮杖
指辰絕音頽息甚甚玄右在彼峻極

少君善柯怡爾豐頰俯觀劉漢仰接姜栢式宴
安期巨棗爲食神元位往後來其嘆

在漢之衰和火炎精梅公指景有皇遺形逝彼
文辭胥此洞庭神輝絕景豈外北冥

張招澄精妙思玄芒則是神物錯綜微章乃幽
乃顯若存若亡因形則變倏忽無方

生在清純放情玄味在物淵沉沂虛攸遂清酒
一壺百朋具醉有命集止乘龍來萃載見君子

言觀其蔚劉根登嵩遺世盤桓形委服容口默

瓊蘭挹彼呼翕爲爾朝飡景絕巖穴光茂雲端

伯嚴志道翻飛自南北食中嶽練形嵩岑奔星

凌顏朱光垂陰雲精九握耀盈襟

長房有懷承師問道蒙險洪海晞心玄浩將登
蓬萊祚爾難老嘉命旣錫如何勿考

逝矣何女芳靈旣彫安寢曾丘逝魂清宵喪魄
載營大墓崇朝王趾再步於焉逍遙

焦生卜居在河之東皓襟解帶嘉卉結容願神
太素淑思玄冲在彼黃堂明道固窮

北狄務塵在彼沙漠含神自願靜居有恪自彼
王庭聿來伊洛天子命之載見紫閣
衛矣終化靈毛揚葩慎爾貞心神祉來荷靡靡
夷門體道含真食茹靈卉凌雲願神
林陽餌車明視聰耳壯子既食步晞千里任化
凱入輕雲揮止移形善變載坐載起
悠悠鬼谷永言潛止要終有集資生無始細繆
方平在彼二子芬響蘭揮有來盈耳

盛德頌

余行經泗水高帝昔爲亭長於此瞻望山川意

有恨然遂奏章以通情焉并爲之頌云爾

晉太子舍人糞土臣雲稽首再拜上書皇帝陛下
下臣雲頓首死罪伏惟陛下紹軒轅之獻哲越
三代之高蹤膺有聖之玄景詠生民之上略秦
政肆虐漸豐生民在昔上帝乃眷多方肅雍寶
命鑒民顧天思文獻聖以宅神器六合焱駕八
荒錯企皇居於阿房倚逸鹿於九野謀猷回
通天人匪祚乃蕭斯國授漢于夜京是以先詔
五緯章太素神母哀號底命丹野九垓闢授命
之符鈞天清建皇之墜陛下螭蟠泗水龍躍下

亭慶雲徘徊紫塵熠燿皇威肇於斷蛇神武基
於豐沛掩四維以蓋天廓玄謨以闢宇華宮山
藏玉堂海紉雲蓋景陰金門林藪拔足崇長揖
之賓吐食納獻規之容玄猷上通德下濟仰翰
雲禽俯躍魚魴是以四海之內莫不企景嶽以
接羣望廣川而鱗集乘山涉水視險若夷奔波
闕廷思効死節乃鳴鸞在衡奔騶服輅良平鳳
栖信布虎據豪雄凌暴於外奇功補闕乎內威
謀兼陳智勇畢効乃凌河海河海無梁乃什高
山嶽華不重三秦席卷項籍灰分連虜霧散遺

寇雲徹泛時雨以清天灑狂塵以肅地轡於川
與竦峻蓋於蒼昊功濟宇宙德被羣生天人允
嘉民神協愛歷數在身有命將集而陛下猶復
允執高讓成功靡有普天歸德羣臣固請然後
謁天皇於圓丘巡萬乘於帝室率土離暴秦之
亂臣妾蒙有道之惠戎羗蠻夷之虞雕趾肅慎
之國莫非帝臣巍巍蕩蕩蓋天臨地自啓闢以
來有皇之美未有若聖功之著盛者也臣雲頓
首頓首死罪死罪臣以鄙倍文武無施忝寵本
朝承乏下位而臣邁愍自西徂東行邁攸止路

經泗水伏見史臣班固撰錄聖功竊承陛下扶
桑始照天暉未融之日嘗臨御此川於是即命
舟人弭楫水止瞻仰山川舊物不替永惟聖輝
罔識所憑遠眺邇全感物興哀終懷靡及俯心
遐慕臣命違下載之運身坐四百之外恨不得
役力聖明之鑒寓目風塵之會揮戈前隊待罪
下軍抽鋒咸陽之關提鉞項籍之領痛心自悼
不知所裁行役之臣牽制朝憲雖懷彷徨王事
靡監肅將言邁實銜罔極臣聞遊魂變化神道
無方雖聖靈登遐降陟在天連光五精流輝太

一或冀神輿降觀薄猗五服時邁玉輅言巡茲
邑是以下臣仰瞻紫宮俯要恍惚愚情振蕩靡
審所如不勝延頸紫微結心閭闔之情謹住水
濱拜章陳愚臣雲誠惶誠恐頓首頓首死罪死
罪臣稽首以聞臣雲言臣聞歌詠所以宣成功
之烈詩頌所以美盛德之容是以聞其聲則重
華之道彌新存其操則文王之容可覩永惟陛
下聖德豐化比隆前代元勳茂功超蹤在昔故
詩歌之所依詠金石之所揄揚者也臣謹上盛
德頌一篇雖不足以仰度天高伏測地厚貴獻

狂夫區區之情臣雲云云晉太子舍人臣陸雲
上於皇漢祖纂胄有唐平章在昔文思百王丹
輝栖列火精幽光爰茲聖緒頽維弛綱靈曜熠
爍濟景扶桑則天未墜重規旻蒼其規伊何橫
乾作峻厥德不囿矩地能順憑河拓景襄岳殷
韵龍章景偉虎質頌變有秦不競罔極黔首震
驚予師思虔神主上帝曰咨天鑒有赫乃眷伊
漢此惟予宅明明聖皇既受帝祉雲騰下邑風
駭泗水仰鏡天文五緯同晷俯察雲符神母爰
止思文聖王克廣克遐威凌羣姓德潤諸華爰

祀天人天人攸嘉爰輯蒸徒所和既和既和既
順乃矢德音豐沛之旅其會如林朱旗虹超彤
旆電尋推師蕭曹撫劔高吟元戎薄伐時罔不
龕凌波川潰肆野陸沉咸陽克殄既係秦后哉
我阿房乃清帝宇穆穆聖皇天保攸定有項畔
換不式王命旣愆黜我西土於鑠王師遵時匪
怒爰赫乘輿席卷三夏嘽嘽戎軒矯矯乘馬夷
伐強楚至于垓下天誅薄曜暴籍授首區夏旣
混宇宙蒙又肅肅帝居巍巍神器有皇于登是
臨天位綉文于裳組華于黻明明天子有穆其

容至止鏘鏘相惟辟公宣聲路寢發號紫宮頌
此愷悌以畜萬邦思樂皇慶協于時雍琴瑟在
御大予舞功越裳委贄肅慎來王明明聖皇闔
國乘制分圭昨勞河山命誓禮律克彰典文垂
藝有漢恢恢䟽罔不替聖功克明九方孔安良
宰內幹武臣外閑漸澤冀域沾被戎蠻連光太
素萬載不刊

祖考頌

雲之世族承黃虞之苗緒裔靈根之遺芳用能
枝播千條穎振萬葉繁衍固於三代饗祀存乎

百世豈非皇慶之積祐神明之殷祥者哉在周
之衰有媯之後將育于姜而貞龜發鳴鳳之兆
周史表觀國之繇故能光宇營丘奄有東海支
庶蕃廡而胤祚昌大矣遭世多難子孫蕩析逐
于南土烈祖丞相邵侯顯考大司馬武侯明德
勲哲■雄特秀固上天所以繼跡前期惠成顧
者也是以有吳雲興而邵侯龍見遂風騰海壖
電斷荆楚運籌制勝底定經略文德光宣武功
四克乃作台衡以御于王政天罔與先代比隆
義問與前修接響固所謂汪汪浩浩不世出者

哉武侯以光遠之度襲重規之範宣朗之明照
曾暉之景故寅亮樞極則萬物淳曜緝熙有邦
而宇內恪居及至中葉亂曰虎臣緩援既集而
大難時弭德濟封域之內威揚函夏之表遂仍
世作宰焜曜祖業車實襲軌表不改帶元勳曷
於光國洪烈著於隆家考德計功比之前代未
有茂於此者也是以小子敢慕微猷欽述芳烈
雖不足以當朱弦之一唱發清廟之三歎蓋爾
臣子之遺恩罔極之所處也乃作頌曰
悠悠聖緒上帝是臨世篤其猷于顯徽音神風

往播福祿來尋靈根既茂萬葉垂林繁盛
穎寧漢陰既曰寧止芳祐允淑乃步斯淳
有陸赫矣二公應期載育明明邵侯允哲允
獻心昭德叔問宣猷如日之升如川之至炎精
既頽黃揮曷煥光宅海邦大造江漢王于出征
二公斯難長驅致屈九有有判咸黜凶醜區域
寧晏天祿未終大命有集卜食東夏元龜既襲
聿來耶宮作蕃舊邑公徒斯振帝旅凱入於變
時雍神道經始肅肅九命永言徽止公拜稽首
對敷天子猗歟盛歟邵侯有作我考纂戎爰究

爰度遠除尋軌崇基式廓昭明有家祖廟奕奕
中葉虎臣稱亂而秦靈旆電揮伐鼓霆震會朝
哀舉征不浹辰遐風遠掃萬里無塵有族斯祐
念功在茲衮衣之宜遂作上司台光增朗方險
載夷穆矣暉章有吳之旗我祖我考受言藏之
擘擘藻裳再命同服駢駢四牡二世方轂分珪
比瑞天秩底祿公堂駿趾華構重屋昔在二伊
于殷有聲在漢之興亦曰韋平惟祖惟考履貞
大亨邈彼披陽追蹤阿衡駿惠雨施景潤雲行
洋洋玄化功濟其民風馳海表光被嶽濱二后

一規世有哲人肅雍碩響萬載是振

張二侯頌

張氏之先蓋少昊氏之苗裔也其在春秋晉德
方休而張老延譽爰暨有漢文成佐命初基司
空揚聲於末葉流長祚遠世之侯輔吳將軍
文侯遭季末雲擾遂避難于東有吳之興寔爲
謀主相即世援建太祖知命審於將萌先識鏡
於未兆遂作上將輔成王業立朝無不易之方
正色有犯顏之亮固所謂寒謇王臣古之遺直
者也奮威將軍定侯明德光遠軌量弘濟文敏

足以華國威略足以振衆重規繼體而大業暉
崇故休柞頻繁寵靈仍世天秩之體彌彰而毀
盈之心茲冲用能保寵固世考終碩問蓋竹帛
之所光宣詠歌之揄揚也乃作頌曰

烈文遠祖肇自上皇金天淳曜遠濟窮桑真人
有作飛龍在天留侯載是階雲自淵即謀神造
啓運妙玄有漢再命度邑于東其中葉誕育
司空邈矣唐陵有恭斯庸寧行盈止世篤天祿
神之聽思俾我戩穀繁過芳祐底之洪族洪族
既昌再惠音徽於穆二侯仍世雙飛堂堂輔吳

抑抑奮威如龍之躍如鳳之揮薄言戾止在彼
紫微金卯紛若四海畔換文侯乃顧妙世達觀
逝彼塗方茲江漢鳴飛遵海聿來有亂遭家不
造殲我明聖栢后肇揚侯承末命皇大烝哉天
保未定匪侯卹慶宗緒孰正帝整我旅外簿四
荒命作惟師時惟鷹揚遂登上將亮彼大皇底
也昨土命珪有璋蹇蹇我侯明發宿夜襲彼遺
直興言有暮聿懷來忠王室之故猗歟定侯祗
服清曜奕奕瓊軌玉潤淑貌淵謂往藏朗思來
照曾是徽章再世被荷庸勲開國明道隆家茲

苾其芬淑閔楊和有蔚其文如林之華皇矣帝
祚受言既崇女有行作合儲宮條延延紫極頴
衍皇寧豐豐定侯在盈思冲祗寵戒溢永懷慎
終重光並曜播我芳風

榮啓期讚

榮啓期者周時人也值衰世之季末當至道頽
凌遂隱居窮處遺物求已泝懷玄妙之門求意
希微之域天子不得而臣諸侯不得而友行年
九千被裘鼓琴而歌孔子過之問曰先生何樂
答曰吾樂甚多天生萬物唯人為貴吾得為人

矣是一樂也以男為貴吾又得為男是二樂也
或皆不免於襁褓而吾行年九十是三樂也夫
貧者士之常也死固命之終也居常待終當何
憂乎孔子聽其音為之三日悲常被裘帶索行
吟於路曰吾著裘者何求帶索者何索遂放志
一丘滅景榛藪居真思樂之林利涉志憂之沼
以卒其夫年榮華溢世不足以盈其心萬物兼
陳不足以易其樂絕景雲霄之表志濯北溟之
津豈非天真至素體正含和者哉友人有圖其
象者命為之讚其辭曰

芒芒至道天啓德心自昔逸民遁志山林邈矣
先生如龍之潛夷明收察滅跡在陰傲世求已
遺物自欽景遯瓊輝響和絕音戀彼丘園研道
之微思樂寒泉薄採春蕤鳴弦清泛撫節高微
有聖戾止永言傷悲天造草昧負道實嘉於鏗
先生既體斯和熊羆作祥黃髮皤皤耽此三樂
遺彼世華翼翼彼路行吟以遊的的黻冕陋我
輕裘永脫亂世受言一丘媚茲常道聊以忘憂

嘲褚常侍

六年正月前臨川府丞褚老常侍君子謂吳如

是乎能官人官人國之所廢興也古之興王唯
賢是與呂望漁釣而周王枉駕寧戚叩角而齊
王忘寐委斯徒而靡好爵釋短褐而服龍章姬
姜之族非無人也執昵之愛非無懷也取彼庸
賤之徒登之佐臣之列故九賢翼翼世而有命既
集五子佐時匡霸以濟夫唯能官人之所由也
褚氏大夫之常佐遠邦之賤司才則邵矣官實
陋矣而拔出羣萃超昇階闈雖文王登師桓公
取佐亦何以加之詩曰濟濟多士文王以寧言
官人得才也褚常侍聞之喜曰君子之言豈虛

也哉吾得此足矣君子謂褚常侍於是乎不謙
謙也者致敬以存其位者也謙之不存德無柄
矣世之治也君子自以爲不足故撙節以求役
于禮敬讓以求安于仁世之亂也在位者自以
爲有餘故爵豐而求更厚位隆而欲復廣世之
治教恒由此作今褚侯蟬蛻利木鵠鳴玉堂不
庶幾夙夜允集衆譽而意充於一善心盈於自
足足則無求盈則無戒不求則善遠之無戒則
惡來之亦何以爲君子哉詩云戰戰兢兢如臨
深淵慎之至也褚常侍聞是言也懼謂之昌言

也而拜之君子曰褚侯其幾矣聞善而喜過
又應之懼嘉服義之賢而拜謹言之辱規同禹
迹義均罪已君子哉吳無君子斯焉取斯

牛責季友

天造草昧萬物化淳類族殊品莫向乎人令子
履方象以矩地戴圓規以儀天該芳靈之疑素
挺協氣於皓玄故神窮來思洞無閒踊翰則
憤凌洪波吐辭則辨解連環子何不絕淵而
躍照日之先使穎秀暘谷景溢扶桑俯經見龍
之輝仰集天人之堂雖子之服旣未而素今子

之滯年時云暮而晁不易物車不改度子何不
使玄貂左弭華蟬右顧令牛朝服青軒夕駕輶
輅望紫微而風行踐蘭塗而安步而崎嶇隴坂
息駕郊牧玉容含楚孤牛在疾何子崇道與德
而遺貴與富之甚哉日月逝矣歲聿其暮嗟呼
季友盛時可惜迨良期於風柔競悲飆於葉落
陳讜言於洪範圖形於霄閣使景絕而音流芬
身荐而榮赫奕子如不能建功以及時予請迹
於栢林之薄

陸士龍文集卷第六

陸士龍文集卷第七

晉清河內史陸雲士龍

騷

九愍

昔屈原放逐而離騷之辭興自今及古文雅之
士莫不以其情而玩其辭而表意焉遂廁作者
之末而述九愍

齊皇聖之豐祐膺萬葉之多福真龍暉以底載
啓元辰而誕育考度中以錫命端嘉令而自肅
蘭情馥以芬香瓊懷皎其如玉希千載以遙想

和遠思而自怡，範方地而式矩，儀穹天而承規，
結丹欸於璇璣，協朱誠於四時，咨中心之信修，
佩日月以爲旌，悲年歲之晚暮，殉脩名而競心，
仰勲華之耿暉，詠三辟之遐音，握遺芳而自玩，
挹浩露於蘭林，陰雲紛以興，靄颺風起而回波，
黨明滂以惡美，疾傾宮之揚娥，樹椒蘭於瑤圃，
掩交光於瓊華，邁貞心以誰忒，毀玉質而崇瑕，
甘莠言而棄予，忽遐放其若遺，瞻前軌而我先，
顧後乘而駕遲，遵荒塗而伏軾，撫鳴鸞而稱悲，
感瞻鳥之有集，嗟離瘼之焉歸，靜沉思以自瘳。

願凌雲
而天飛

修身

逢天怒而離紛，邁時咎於惟塵，端周誠以恪居，
祇後命而自寅，悲讒口之罔極，高離情於參辰，
豈三錫之又晞，乃齋予於遐賓，運羽擢以涉江，
浮鄂渚而駕言，背夏首以窘逝，兮泝行川而永，
歎結風回而薄水，兮源波榮而重瀾，情懷眷以，
疊結舟，漭流而中盤，昶愁心以自邁，肅榜人而，
魯驅詔河馮以清川，命湘娥而安流，濟南詔以，
佇望野蕭條而振疇，獸悲號以命旅，鳥狂顧而，
鳴仇悲我行之悠悠，怨同懷之莫求，發辰陽而

往彼綠湘沅而來假亦芳樹於縣車秣梁苗於
樊馬山高高以藏景雲晝靄而荒野鳥拊翼於
薨巔水回波於宇下指明星以脉路景即陰而
無旅隨長川以問津響脩聲而和予聽歸音以
自聞踐無迹以窮處雖遘愍之既多亦顛沛其
何侮仰衆芳之遺情希絕風之延佇

涉江

亂曰有鳥翻飛集江湘兮彼美一人莫予將兮
念茲涉江懷故鄉兮生日何短感日長兮顧我
愁景惟永傷兮積沉毒於苦心蒐憑虛以飄蕩

形息景於重陰虎鳴颺以拂谷螭回雲而結林
操土音以懷郢涕頻代而盈襟辭終古之舊墟
託茲邦而遙集望龍門而屢顧樊惟桑而祗泣
悲惠之難狀振枯形而獨立撫彫容之日頽怊
炯思而弗及聞先黎之達教固積善於遺慶晞
明休而受言想介福之保定靡心貞以祗服沂
大順而委命君在初之嘉惠每成言而永日怨
谷風之攸歎彌九齡而未徹願自獻於承間悲
黨人之造膝舒幽情其曷訴卷永懷而淹恤嗟
哲士之足歎傷邦家之殄瘁痛靈脩之匪懷頽

九成於一匱忘大寶之勿假輕挈瓶之守器仰
剪翮於凌霄俯歸飛於矰罟毀方城於秦川投
江漢於泥涓悲彼黍之在郢悼宗楚之莫餼撫
傷心以告哀將斯情之孰慰

悲郢

登高山以遐望悲悠處之淹流豈大川之難濟
悲利涉之莫由申脩誠以底節反內鑿而自求
考余心其焉可往稽度於神謀訪斯言以卜居
想貞龜以告猷將矯翼而塗險思振清而世濁
羗釋筮而評子諒不疑其何卜朝彈冠以晞髮

夕振裳而濯足有懷沙以赴淵無抱素而蒙塵
愁纏綿以宅心長歎息而歛淚步江潭以彷徨
頻行吟而含瘁遇漁父之戾止興讜言而來憇
雖懷芳而握瑜懼惟塵之我穢顧虛景而端形
矧同波於其醉迨伊人之逍遙聊仰葉於林側
懷達心以遠寤怡哀顏而表色仰班荆之遺情
想嘉訊而良食若有言而未吐忽棄予而凌波
揮龍榜以鼓汰遺芬響而清歌俟滄浪之濯纓
悲余壽之幾何愧褊心之歎渝恨爾謁之莫和
指江魚之言志營玄寢於汨羅荷懷忠而死節

豈有生之足嘉

行吟

悲怨思之多感情惆悵而遠慕世玄黃而既渝
心居貞而抱素冀斯氣之一清要住人於天路
考年載以遲之悲歲聿之已暮攬豐草於朝日
思先晞於湛露規法圓而天象矩則方於地形
祇信順以自軌邀式穀於神聽悲登嵬之無抗
訊貞夢而選靈悔相道而懷顧悲實蕃之已盈
頑椒丘而息駕振初服而翱翔結瓊蕤之芳襟
襲凌華之藻裳懷瑤林之珍秀握蘭野之芳香

命巫咸以啓期訪百神而考祥靖永言以聽命
欽靈諱而肅邁振華冕之玉藻樹象軒之高蓋
率假翼以鳴和霓揮景而縈旒芳塵穆以煙煜
彤雲起而深藹遊八極以大觀解飛轡以長想
將結軌而世狹願援楫而川廣雖我服之方壯
思振策其安往舒遠懷以弭節褰世羅於天網

紆思

亂曰猗猗芳草殖山阿今朝日來照發豐華今
秋風蕭瑟凝霜加兮傾葉懷春猶俟河兮徧周
流而無過悲窮思之永久聽幽荒而罔詔眷寥

廓而無友沉流液於繩樞逝回颺於甕牖呼寂
寞而靡應攬虛無其何有神悠悠而永念憂綢
繆而盈室哀惻心而響起時棄予而景逸招逝
運其難徵儀遺軌而無律雖芳林之將焚豈蘭
響之可謚晞馥風於曠野思同芬而靡質命險
太其靡常道離隆而匪易紆幽情而思古援在
昔而立辟俟重華以同遊悲瑤圃之難適舟登
陸其焉濟輪涉淵而無迹悲荒塗之既舛臨遵
渚而投策欲隨波以周流恨匪石之難頽將從
風而卷舒悲宜矢之辭懷貞郎志而玉折厲勁
心而蘭摧喟我懷以寤歎聞前鑒而自勵忠與
邪其莫可豈余命之所窮俯投迹而世洽飾
志而道隆耻蒙垢於同塵思振揮於別風明爽
心以畢志考吾道以自終

考志

天機偏其挺蓋玉衡運而回襄景彌脩而日短
時愈促而夜長和音變而改律乘風革而爲商
感秋林之夙暮悲芳草之中霜存攸忽而風過
逝揮霍而雲散方輕焮而灼遲比收電而景宴
將愉樂以夙興迨良日於昧旦痛予生之不振

逢此世之多難將藹藹而未颺世渾渾其難澄
風頽山以離谷波平淵而爲陵道曠世而朴散
化固滯而物凝恨輔德以莫舉悲民鮮之孰勝
景照明以妙見音振響而攄聞金淬堅以示斷
芑靡質而效芬罄貞規以殉節反蒙謫於明群
咨小心以惴惴悲江草之芸芸

感逝

亂曰乳雲晻藹天明息兮增羅重設鳳矯翼兮
梧桐逝矣樹榛棘兮思我芳林唱歎息兮哀時
命之險薄懷斯類以結憂手拊膺而永歎形顏

景而長愁生遺年而有盡居靜言其何須將輕
舉以遠覽眇天路而高遊結垂雲之翠虬駕琬
琰之玉輿揮采旄以煙指靡華旌而電舒命日
月以清天吾將遊乎九閼命屏翳以夕降式飛
廉以朝興塗蒙雨而後清景貞暉而先登陪湘
妃於彫輅列漢女以後乘瓊娥起而清嘯神風
穆其來應駢憑雲而響駭駘嘘天而景凌望紫
微以振策珊太階而遂升飛芝蓋之翼翼回雲
車之鱗鱗朝總轡於扶桑夕飲馬於天津伐河
鼓以解微迄是崙而凱振軌凌虛而遺迹塵蒙

陸士音卷七
颺而絕輪豈遠遊之無樂懷故都而傷情靡龍
首以還顧轉瑤衡而四索泝凱風以流盼悲舊
邦之穢傾眷南雲以興悲蒙東雨而淅零凌百
川而絕蹈仰濯髮於崢嶸豈沉瘁之足弭將蟬
蛻於長生

征

痛世路之隘狹詠遂吉而長悲鏡端形於三接
照直影於太微祗中懷以眷慕豈鑒寐而忘歸
悼天朝之遂晦爓只錦於繁文侈南箕以鼓物
藹清陽而播芬迹同塵而壤絕景和光而天

俯隕息於縈波仰頽歎而崩雲折若華以翳日
時靡靡而難停食秋菊以却老年冉冉其既盈
欲假翼以天飛怨曾颺之我經思戢鱗以遁沼
悲沉網之在淵有河清而志得挫千載之長年
擠哀響於頽風寓悲音於絕弦嗟有生之必死
固逸我以自休彼達人之遺物甘褰裳而赴流
矧余情之沉毒資有生以速憂悼居世其何感
固形存其爲尤想百年之促期悲樂少而難多
簡與短其足宏曷久沉於汨羅投瀾漪而負石
涉清湘以懷沙臨恒流而自墜蒙濬壑之隆波

接申胥於南江
仰接景而登遐

鼓冕雲以携手

陸士龍文集卷第七

陸士龍文集卷第八

晉清河內史陸

雲士龍

書

與平原書

一日案行并視曹公器物狀薦席具寒夏被七
枚介幘如吳幘平天冠遠遊冠具在嚴器方七
八寸高四寸餘中無鬲如吳小人嚴具狀刷膩
處尚可識跡批剔齒織經皆在拭目黃絮二在
垢垢黑目淚所沾滲手衣卧籠挽蒲棋局書箱
亦在奏案大小五枚書車又作歧案以卧視書

扇如吳扇要扇亦在書箱想兄識彥高書箱甚似之筆亦如吳筆硯亦爾書刀五枚琉璃筆一枚所希聞景初三年七月劉婕妤好析之見此期復使人悵然有感處器物皆素今送鄴宮大尺間數前已白其總帳及望墓田處是清河時臺上諸竒變無方常欲問曹公使賦得上臺而公但以變譎因旋避之若焚臺當云何此公似亦不能止文昌殿北有閣道去殿文內中在東殿東便籬陳留王內不可得見也

十一三上臺曹公藏石墨數十萬斤云燒此消

復可用然煙中人不知兄頗見之不今送二與曹公遺事天下多意長才乃當爾作弊屋向百年于今正平夷塘乃不可得壞便以斧斫之耳爾定以知吏稱其職民安其業也

雲再拜前省皇甫士安高士傳復作逸民賦今復送之如欲報稱久不作文多不悅澤兄爲小潤色之可成佳物願必留思四言五言非所長頗能作賦爲欲作十篇許小者以爲一分生於愁思遂復文誨欲得雲論間在郡紛紛有所鈞定言語流行斷絕欲更定之而了不可以思慮

今自好醜不可視想冬下體中佳能定之耳兄
文章已自行天下多少無所在且用思困人亦
不事復及以此自勞役間居恐復不能不願當
自消息謹啓

雲再拜祠堂頌已得省兄文不復稍論常佳然
了不見出語意謂非兄文之休者前後讀兄文
一再過便上口語省此文雖未大精然了無所
識然此文甚自難事同又相似益不古皆新綺
用此已自爲洋洋耳蒼少明詩亦未爲妙省之
如不悲苦無惻然傷心言今重復精之一日見

正叔與兄讀古五言詩此生歎息欲得之謹
雲再拜二祖頌甚爲高偉雲作雖時有一佳語
見兄作又欲成貧儉家無緣當致兄此謙辭又
雲亦復不以苟自退耳然意故復謂之微多民
不輟歎一句謂可省武烈未得有吳說桓王之
事而云建其孤恐太祖不得爲桓王之孫雲前
作此頌及信以白兄作遊仙詩故自能劉氏頌
極佳但無出言耳二頌不減復過所望如此已
欲解此公之半歲暮賦甚欲成之而不可自用
得此百數十字今送不知於諸賦者不罷少不

想少佳成當送到洛陳琳大荒甚極自雲作必
過之想終能自果耳謹啓

雲再拜兵真凶事生來初不見習頃觀之正自
使人意惡羊腸轉時極佳問人皆不解何以作
此轉雖云欲相泄恐此正自取好耳說之不能
工願兄試一說之張義元蒼貞淵之回流崑崙
吐河不體正自似急水中山石間是人謂回縛
者但言之辭不工耳不知此中語於諸賦中何
如頃曰極勿勿病一十當出略通曰在馬上此
不可諧又恐信不及兄令以因休祖致又力作

無錫書極無賴甚不備具如是更白問於中

雲再拜爾乃使熊羆之士處闕之將雄聲泉踊

逸氣風亮超三軍以奔厲晉餘勇以成壯先洪

音於寂寞先無聲而高唱元兵時紛若屯雲煥

若積波授教斯謐靜言勿譁嚴鼓隱其雲戒萬

夫翁而咸和治安步以止立應金奏而靡戈進

總干以乘言退揮旅而星羅禮既畢歸旅將振

尋繁貞轉因瀨蓋旋若疾流之繞駿沉驚颺之

靡狂塵羊腸轉時命屏翳以夕降式飛廉而朝

興涂蒙雨而後清景帶天而先澄陪峻臣於彫

輅列名僚於後乘猛將起而虎嘯商風肅其來
應士憑勢而響駭馬噓天而景凌

雲再拜省諸賦皆有高言絕典不可復言頃有
事復不大快凡得再三視耳其未精倉卒未能
爲之次第省述思賦流深情至言實爲清妙恐
故復未得爲兄賦之最兄文自爲雄非累日精
拔卒不可得言文賦甚有辭綺語頗多文適多
體便欲不清不審兄呼爾不詠德頌甚復盡美
省之惻然扇賦腹中愈首尾發頭一而不快言
烏云龍見如有不體感逝賦愈前恐故當小不

然一至不復減漏賦可謂清工兄頓作爾多文
而新奇乃爾真令人怖不當復道作文謹啓

雲再拜祠堂贊甚已盡美不與昔同既此不容
多說又皆一事非兄亦不可得見弔少明殊復
勝前弔蔡君清妙不可言漢功臣頌甚美恐弔
蔡君故當爲最使雲作文好惡爲當又可成耳
至於定兄文唯兄亦怒其無遺情而不自盡耳
丞相贊云披結散紛辭中原不清利兄已自作
銘此但頌實事耳亦謂可如兄意具說事而已
右當復屬文於引便當書前銘耳謹啓

雲再拜誨欲定吳書雲昔嘗已商之兄此真不
朽事恐不與十分好書同是出千載事兄作必
自與昔人相去辯亡則已是過秦對事求當可
得耳陳壽吳書有魏賜九錫文及分天下文吳
書不載又有嚴陸諸君傳今當寫送兄體中佳
者可並思諸應作傳及作引甚單常欲引之未
得兄所作引甚好雲方欲更作引述思賦黨首
竭屬然雲意皆已盡不知本復何言方當積思思有
利鈍如兄所賦恐不可湏願兄且以伯聲兄弟
前日觀習先欲作講武賦因欲遠言大體欲獻

之大將軍才不便作大文得少許家語不知此
可出不故鈔以白兄若兄意謂此可成者欲試
成之大文難作庶可以爲關雎之見微謹啓

雲再拜往曰論文先辭而後情尚絜而不取悅
澤嘗憶兄道張公文子論文實自欲得今日便
欲宗其言兄文章之高遠絕異不可復稱言然
猶皆欲微多但清新相接不以此爲病耳若復
今小省恐其妙欲不見可復稱極不審兄由以
爲爾不茂曹碑皆自是蔡氏碑之上者比視蔡
氏數十碑殊多不及言亦自清美愚以無疑不

存三祖贊不可聞武帝贊如欲管管流澤有以
常相稱美如不史願更視之小跋幾而悅奕爲
盡理雲今意視文乃好清省欲無以尚意之至
此乃出自然張公在者必罷必復以此見調不
知九愍不多不當小減九悲九愁連日鈔除所
去甚多才本不精正自極此願兄小爲之定一
字兩字出之便欲得遲望不言謹啓

雲再拜仲宣文如兄言實得張公力如子桓書
亦自不乃重之兄詩多勝其思親耳登樓賦無
乃煩感丘其弔夷齊辭不爲偉兄二弔自美之

但其呵二子小工正當以此言爲高文耳文中
有於是爾乃於轉句誠佳然得不用之益快有
故不如無又於文句中自可不用之便少亦常
云四言轉句以四句爲佳往曾以兄七羨回煩
手而沉哀結上兩句爲孤今更視定自有不應
用時期當爾復以爲不快故前多有所去喜霽
俯煩習均弔誠重離此下重得如此語爲佳思
不得其韻願兄爲益之謹啓

雲再拜嘗聞湯仲歎九歌昔讀楚辭意不大愛
之頃日視之實自清絕滔滔故自是識者古今

來爲如此種文屯爲宗矣視九章時有善語大類是穢文不難舉意視九歌便自歸謝絕思兄常欲其作詩文獨未作此曹語若消息小往願兄可試作之兄復不作者恐此文獨單行千載間常謂此曹語不好視九歌正自可歎息王褒作九懷亦極佳恐猶自繼真玄盛稱九辯意甚不愛

雲再拜頃得張公封禪事平平耳不及李氏其文無比恐非其所作欲見此公劉氏世頃有信願付雲頃又爲輔吳奮威作頌欲愈前頌然意

並不以快遣信當送九愍三賦脫然謂可舉假彼頌便有怯處想無又間便可耳大類不便作四言五言謹啓

雲再拜誨二賦佳久不復作文又不復視文章都自無次第文章旣自可羨且解愁忘憂但作之不工煩勞而棄力故久絕意耳在此悲思視書不能解前作二篇後爲復欲有所作以慰小思慮便大頓極不知何以乃爾前登城門意有懷作登臺賦極未能成而崔君苗作之聊復成前意不能今佳而羸瘁累日猶云愈前二賦不

審兄平之云何願小有損益二字兩字不敢望
多音楚願兄便定之兄音與獻彥之屬皆願仲
宣湏賦獻與服繁張公語雲云兄文故自楚湏
作文爲思昔所識文乃視兄作誅又令結使說
音耳兄所撰願且可付之此有書者更校善書
送信還望之謹啓

雲再拜疏成高作未得去省登遐傳因作登遐
頌湏吏便成視之復謂可行今並送之尚未定
利及此信今更有何所損益後八入了無事合
之亦得二篇耳索度是淫鬼無緣在此中故

不可作頌愁邑忽欲復作文欲定前於用功夫
大小文隨了爲以解愁作文臨時輒自云佳小
久報不能視爲此故息意爾今視所作不謂乃
極更不自信恐年時間復拍棄之徒自困苦爾
兄小加潤色便欲可出極不苦作文但無新奇
而體力甚困瘁耳謹索幼安在此今之草今佳
一弘不呼作工謹啓

雲再拜誨頌兄乃以爲佳甚以自慰文章當貴
經綺如謂後頌語如漂漂故謂如小勝耳九愍
如兄所誨亦殊過望雲意自謂當不如三賦情

難非體中所長欲徧周流雲意亦謂爲佳耳然
不云其愈於與漁父吾今多少有所定及所欲
去留粗爾今送本往不審能勝故不意亦殊未
以爲了南去轉遠洛中勿勿少暇願兄勅所遣
留爲當爾可湏來不佳思慮益處未能補所欲
去徹與察皆不與日韻思惟不能得願賜此一
字雲作文如兄所論已過所望况乃當敢今兄
有張蔡之懷得此乃懷怖也謹啓

雲再拜誨歲暮如兄如所誨雲意亦如前啓情
言深至述恩自難希每憶常侍自論文爲當復

自力耳雲意呼發頭但當小不如復耳兄乃不
好者試當更思之所誨雲文所比愁霖喜霽之
徒實有可爾者登樓名高恐未可越爾揚四公
黃胡頌恐此不得見比聞兄此誨若有喜懼交
集祖德頌無大諫語耳然靡靡清工用辭緯澤
亦未易恐兄未熟視之耳兄文方當日多但文
實無貴於爲多多而如兄文者人不饜其多也
屢視諸故時文皆有恨文體成爾然新聲故自
難復過九悲多好語可耽詠但小不韻耳皆已
行天下天下人歸高如此亦可不復更耳兄作

大賦必好意精時故願兄作數大文近日視子
安賦亦對之歎息絕工矣兄誨又爾故自是高
手謹啓

雲再拜蔡氏所長唯銘頌耳銘之善者亦復數
篇其餘平平耳兄詩賦自與絕域不當稍與比
校張公昔亦云兄新聲多之不同也典當故爲
未及彥藏亦云爾又古今兄文所未得與校者
亦惟兄所道數都賦耳其餘雖有小勝負大都
自皆爲雌耳張公父子亦語雲兄文過子綏安
諸兄賦復不皆過其便可可不與供論雲謂兄

作二京必得無疑久勸兄兄爲耳又思三都世
人已作是語縹類長之能事可見幽通賓戲之
徒自難作賓戲客語可爲耳荅之甚未易東方
士所不得全其高名頗有荅極謹啓

雲再拜誨九愍如所勸此自未定然雲意自謂
故當是近所作上近者意又謂其與漁父相見
以下盡篇爲佳謂兄必許此條而淵弦意呼作
脫可行耳至兄唯以此爲快不知雲論文何以
當與兄意作如此異此是情文但本少情而頗
能作汜說耳又見作九者多不祖宗原意而自

作一家說唯兄說與漁父相見又不大委曲盡其意雲以原流放唯見此一人當爲致其義深自謂佳願兄可試更視與漁父相見時語亦無他異附情而言恐此故勝淵弦兄意所謂不善願疏勅其處緒亦欲成之今出意莫更感如惡所在以兄文雲猶時有所能得言雲前後所作謹啓

雲再拜誨前二賦佳視之行已復不如初昔文自無可成藏之甚密而爲復漏顯世欲爲益者豈有謂之不善而不爲懷此不成意想兄已得

懷之耳有作文唯尚多而家多猪羊之徒作蟬賦二千餘言隱士賦三千餘言既無藻律體都自不似事文章實自不當多古今之能爲新聲絕曲者無又過兄兄往日文雖多瑰鏤至於文體實不如今日間在洛有所視已當赦而比更隆以今意觀文見此真史以爲不盡善文罷云故日向人歎兄文人終來同殆以此爲病張公文無他異正自情省無煩長作文正爾自復佳凡文章已顯一世亦不足復多自困苦適欲白兄可因今清靜盡定昔日文但當鈎除差易爲

功力誨已定敬長誅意當闡與凡合雲久絕音
於文章由前日見敦之後而作文解愁聊復作
數篇爲復欲有所爲以忘憂貧家佳物便欲盡
但有錢穀復羞出之而體中殊不可以思慮腹
立滿背便熱亦試可悲間視大荒傳欲作大荒
賦旣自難工又是大賦恐交自困絕異往經比
干墓悵然欲弔之無又即意又事業

雲再拜張公藏誄自過五言詩耳但雲自不便
五言詩由已而言耳玄泰誄自不及士祚誄兄
丞相箴小多不如女史清約耳恐兄無緣思於

此意猶云何而兄乃有高倫更復無意雲故曰
不作文而常少張公文今所作兄轍復云過之
得作此公輩便可裴然有所謝故自爲不及諸
碑藏輩甚極不足與校歌亦平平

不空

彼見人譖叙者當與令伯倫吳百官次第公卿
名伯略盡識少交當具頌作頌及吳事有愴然
且公傳未成諸人所作多不盡理兄作之公私
並叙且又非常業從雲兄來作之今略已成甚
復可借事少功夫亦易耳猶可得五十卷謹啓
義高家事正當付令文耳弟彥長昔作吳事云

三十卷可令欽求謹啓

雲再拜吳書是大業既可垂不朽且非兄迷此一國事遂亦失兄諸列人皆是名士不知姚公足爲作傳不可著儒林中耳不大識唐子正事愚謂常待便可連於尚書傳下書定自難雲少作書至今不能令成日見其不易前數卷爲時有佳語近來意亦殊已莫莫猶當一定之恐不全此七卷無意復望增欲作文章六七紙卷十分可令皆如今所作輩爲復差徒爾文章誠不用多苟卷必佳便謂此爲足今見已向四卷

此五十可得成但恐胸中成癩爾恐兄胸疾必迷作人故計兄兄着此之自損胸中無終不病作書猶差易讚叙亦復無幾年歲根之猶當小復謹啓

雲再拜一日會公大欽欣命坐者皆賦諸詩了不作備此日又病極得思惟立草復不爲乃倉卒退還猶復多少有所定猶不副意與頌雖同體然佳不如頌不解此意可以王弘遠去當祖道似當復作詩搆作此一篇至積思復欲不如前倉卒時不知爲可存錄不諸詩未出別寫送

弘遠詩極佳中靜作亦佳張魏郡作急就詩公甚笑燕王亦似不復祖道弘遠已作爲存耳兄園蔡詩清工然猶復非兄詩妙者雲詩亦唯爲彼一語如佳先已先得便自委頓欲更作之昔如已身先此篇詩了不復倘佛識有此語此語於常言爲佳謹啓

雲再拜久不復作文了無復次第真玄昔屢聞周侯至論前比霖雨此不人亦作愁霖賦好醜見敦又因人見督自愁慘又了無復意此家勤勤難違之亦復毒此雨憂邑聊作之因以言哀

思又作喜霽今送雲作爲易得耳窮不好故都絕意此間人呼作者皆休故不得有所送不審此何成已出之故爲存不棄耳謹啓

雲再拜一日視伯喈祖德頌亦以述作宜褒揚祖考爲先聊復作此頌今送之願兄爲損益之欲令省而正自輒多欲無可如省碑文通大悅愉有似賦愚謂小復質之爲佳前作此頌書之行欲遣信以白兄昨聞有賦消息愁憤無賴旣冀又然又已成書聊以付信耳尋得李寵勸封禪草信自有才頗多煩長耳今送問人又有張

公所作已令寫別送臨紙罔罔不知復所言謹啓

近得洛消息勝未適去二十日書彥先訪爲驃

騎司馬又云似未成已訪難解耳敬屬司馬參

軍此間復失之恨不得與周旋戴允治見訪大司馬謹啓

雲再拜君苗文天才中亦少爾然自復能作文

雲唯見其登臺賦及詩頌作愁霖賦極佳頗倣

雲雲所如多恐故當在二人後然未究見其文

見兄文轍云欲燒筆視以爲此故不喜出之曹

志首之婦公其婦及兒皆能作文頃借其釋詞

二十七卷當欲百餘紙寫之不知兄盡有不

氏云雪與列韻曹便復不用人亦復云曹不可

用者音自難得正謹啓

近日復案行曹公器物取其剔齒穢一箇今送

以見兄于道有古方泉其銘如此不審兄頗曾

見此書種稷不近因魯引以問祕書中謹啓

雲再拜令送君苗登臺賦爲佳手筆云復更定

復勝此不知能愈之不其人推能兄文不可言

作文百餘卷不肯出之視仲宣賦集初述征登

樓前耶甚佳其餘平平豈不得言情處此賢文

正自欲不茂不審兄呼爾不真玄亦云兄文當作宣輩宣得此巍巍耳秋霖喜霽殊自委頓恐此都自易勝謹啓

雲再拜誨頌兄意乃以爲佳甚以自慰今易上韻不知差前不不佳者願兄小爲損益令定下云靈旆電揮因兄見許意遂不恪不知可作蔡氏祖德頌比不景猷有蔡氏文四十餘卷小者六七紙大者數十紙文章亦足爲多然其可貴者故復是常所文耳雲頃不佳思慮胸腹如鼓夜不便眠了不可又以有意兄不佳文章已足垂不朽不足又多謹啓

雲再拜嵇紹周弼並處事不值免詔甚切甚念之悚息胡光祿亡宿士可痛含邠還云滔中書散騎並缺是其才不知何以乃古之謹啓

雲再拜頃哀思更力成歲暮賦適且畢猶未大定自呼前後所未有是雲文之絕無又憶兄常云文後成者恒謂之佳貞小爾恐數自後轉不如今且欲寄之既未大定又恐此信至兄已發當因著洛謹啓

雲再拜兄前表甚有深情遠旨可耽味高文也

凡文雖復自相爲作多少然無不爲高體中不快不足復以自勞役耳前集兄文爲二十卷適訖一十當黃之書不工紙又惡恨不精謹啓

陸士龍文集卷第八

陸士龍文集卷第九

晉清河內史陸

雲士龍

啓

國起西園第表啓

西園第旣成有司啓

王即位未見賓客羣臣又未講啓

與駕比出啓

言事者啓使部曲將司馬給使覆校諸官

財用出入啓

國人兵多不法啓

國起西園第表啓

且遵節儉制

卽中令臣雲言伏見西園大營第室雖未審節度豐儉之制然用功甚嚴竊懼事不得濟愚臣管見輒敢瞽言臣竊見世祖武皇帝臨朝淵嘿訓世以儉即位二十有六載宮室臺榭無所新崇屢發明詔厚戒豐奢國家纂承務在遵奉而世俗凌遲家競盈溢漸漬波蕩遂已成風雖嚴詔屢宣而侈俗滋廣每觀詔書衆庶嘆息清河王昔起墓宅未及極偉時手詔追述先帝節儉之教懇切之旨刑于四海清河王毀壞城宅

以奉詔命海內聽望咸用慙然臣慮以先帝遺教日以凌替聖上憂勤猶未之振今與國家崇大化追闡前蹤者實在陛下先敦素朴而後可以訓正四方示民知禁竊謂第室之設可使儉而不陋凡在崇麗一宜節之以制然後上厭帝心下允民望且自間制國之用事從節省而方於此時大造第宅又非聖意從簡之旨臣以凡才殿下不以其駑闇特蒙拔擢將以臣能有狂失之言可以裨補聖德臣自奉職已來亦思竭忠効節以報所受之施是以不慮犯逆敢陳所

懷如愚臣言有可采乞垂三省

今吾以頑弱過蒙殊寵夙夜祗懼忝思先恩承風誠以自錯厲得爾委曲省以憮然意既在儉約又欲奉遵法憲豈忘於心國自宜有宅城內求不可得官徒右軍來蹀履此屋恐或不可久得側近宮掖故於國作宅不作觀望使如凡家法足止而已耳平量畫圖當往相示動靜以聞臣雲言間一日敢獻瞽言以干聞

聽天恩未加咎責根發明令臣伏誦聖旨奉用歎息臣聞有國者不患宮室之不崇患在令名之不立是以賢人之在富貴莫不卑身節欲已挹情能保其國家令聞百世歷觀古今以約失之者實寡以奢失之者蓋衆非天下之至德孰能居豐行儉在富能貧清儉節素自殿下家道此所以懷集四方而使兆民服者也世祖武皇帝富有四海貴爲天子居無離宮之飾身御家人之服先帝豈欲以此道止於治身而已者哉固將必欲遺訓百世貽燕子孫比固殿下所宜祗奉也昔淮南太妃當安厝臣兄比下墨機時爲郎中令從行太妃令追稱先帝養生送終

事從節儉今宜奉用遺制不事豐厚今旨懇切
言歸于約清河昔起墓宅發手詔又還毀朝野
之論于今未已竊以西園第宅用功方嚴雖知
聖德節儉有素猶復思關愚言以補方一亦臣
繾綣微忠昊天罔極之誠也至被明令聖旨炳
然嘉承至道奉以稱慶不勝下情謹疏以聞

西園第既成有司啓

觀疏諫不可

郎中令臣云臣言前啓西園第宅宜遵先帝節
儉之制不宜使至豐麗被命優隆言歸謙素臣
奉以欣喜而聞屋宇之制既自崇

竊聞考復

起觀六間既非前令之旨且臣亦竊用不安臣
聞詩云昊天有成命二后受之成王不敢康今
四祖創基既垂成命哲王繼體世祖恭儉殿下
承之固宜奉不寧而自昔造第過度民歎其勞
瘁士譏其過尤謗言未弭而又加以崇侈此誠
不可不惜先帝背世曾未十年而儉德之亡國
爲其首此又所以慷慨酸心而不敢不盡狂夫
之諫者也按晉魏以來諸侯奢靡第室滋廣未
有如國今日之甚者也古人之戒猶云無爲福
始况今猶崇豐侈作爲禍先此又臣所以寤寐

憂歎忘寢與食者也殿下誕應運期首建大國
固將憲章令典貽範萬世始基之制不可不慎
今設爲豐奢以示將來子孫象之又何以能國
且先帝勤家如彼其素殿下承之若此其泰進
傷奉國之典退虧隆家之業用之當身損盛德
之譽垂之後嗣非興邦之制一舉而失四得此
古人之所以長太息者也且第宅過朝野所譏
而監司結舌莫敢明言者實以殿下國之昵親
朝所欽重故隱司過之鋒結執憲之繩耳後世
直臣心將信威明法考制度禮愚以此觀有必

毀之理苟此物不可終然誠不如不爲使其無
毀也今空設過制之物而終爲直士之資臣又
未見其可也唯殿下思愚臣之言時命有司必
省此舉手權選伏用流汗令中間表作舍
先畫圖呈啓間數又五木林榑無他鏤飾示無
乃越法奢靡古今無匹也間外啓作小樓北望
河東公主園宅自不爲觀故便聽之耳今行者
嘆息致朝野之譏耶省奏具意勅毀之

王即位未見賓客羣臣又未講啓

宜饗宴通

客及引師友文學觀書問道

郎中今臣雲言聞古之君子既盛德在身又外
求諸物是以廣納俊士博觀載籍朝夕師傳
夙夜勤禮賓友嘉客講義於前徃古來今日聞
于耳故知積德廣而流芳罔極伏惟殿下天資
聰睿應期挺秀聖敬敷聞輝光日新即位已來
仍遭不造大禮雖闋哀故滋有賓客無接覲之
宴師友闕講誦之禮愚臣所以寤寐永歎而私
懷慷慨者也愚以宜發通客之令使朝士有接
見之緣又可時與師友之學披觀文籍坐而論
非學無以聞義非士無以行禮禮義既廢不

羣望允塞此臣下所以拭目思德音之發者也
臣區區所懷敢以聞

令多喪故乃初未與羣官會同比當請師友文
學內外官屬也

臣雲言臣前啓可與師友文學觀書論道今又
天時清適正是講誦之日臣聞崇山之高不厭
其峻滄海之量無限於廣是以周公一日萬事
猶復旁觀百篇孔子假期玩年至於韋編三絕
由是言之雖聖之弘亦不能不求之於學也伏
惟殿下明德光邵天資秀朗方當光演文武允

迪皇猷如復垂精古今之奧仰覽千載之籍則
神道叡知無物不照且師友文學朝選於衆以
德來教雖豐祿崇禮已隆其人而先王之道未
簡聖聽在位累載官廢其職每聽其言亦懷慊
慨臣以可於良日就講經學先闡大道永播芳
風愚臣區區敢獻瞽言

令多病疾難以辭公事爲自力風疾連動故未
能用小差當如所陳乞每識忠至之誠輒以存
心

與駕比出啓

宜當入朝

郎中令臣雲言殿下自郎第日來既仍多哀故
聖體亦恒不安和自不朝見二官已經年載前
既比造趙軹近又自表出城至五日問訊輒以
疾聞臣切所未安愚以此五日與駕宜入朝臣
聞事君之道苟在盡規知無不爲是以愚臣敢
獻瞽言

令多不快不數朝覲幸恩詔見恕耳五日當入
朝也

言事者啓使部曲將司馬給事覆校諸
官財用出入啓

宜信君子而遠小人

郎中令臣雲言伏見令書以部曲將李咸馮南
司馬吳定給事徐泰等覆校諸官市買錢帛簿
率日决咸南等治書以下無所復司而察錢帛
重寶奸吏多情出入之用誠宜使虛實當法以
防檢巧偽然臣愚以聖德龍興光有四大國選
衆官材庶上肄業臣以虛薄忝竊朝右雖質弱
任重無益補察至於奉已思勤昊天罔極中尉
該大農誕皆清德淑慎恪居官次至衆官悉州
閭一蹀閭之咎雖可日聞至於處義用情庶
無大戾今咸南軍旅小人定泰士卒厮賤非有

清慎素著忠公定稱令張使此等任以覆
臣所關猶謂未詳咸等督察然後得信既非關
國勿用之義又傷殿下推誠納下曠蕩之量雖
使咸能盡節益國使功利百倍至於光輔國美
猶未若開懷信士之無失况咸等所益不過姑
息之利而名使小人用事大道凌替此臣所以
慷慨也亂之所興在於小人得親治之所廢在
於君子自替廢興治亂由此而已臣備位大臣
職在獻可苟有管見敢不盡規以愚宜發明令
必罷此等覆察衆士一付治書則無外之度照

光遠大信臨下人思盡節矣謹隨啓以聞

國人兵多不法啓

宜峻其防以整之

郎中令臣雲言國人兵於橫多行非法至使暴
及市道聲聞京邑親信兵乃罵詈洛陽市丞遠
近囂然聲論日廣而主者前復所報每蒙寬宥
故羣小敢肆其暴虐前輿駕當東時臣具以奏
聞上立節度亦備嚴上下司察念在奉宣而親
信卒忝矯稱突關強市民物至使行道哀窮路
人歎惋臣下祇命幸使罪人時獲僉以忝宜加
重戮以戒肅方來軍都督李嬰行實奸穢然身

備王人雖不致法猶加捶楚主者奏忝依嬰決
罰事寢不出而特令原忝忝之凶狡罰至大辟
至於今日不蒙薄罰臣切以自今羣醜虎視競
爲暴虐矣小人得志則下凌上替前卿顯言事
大農文旨倨傲反成却安功名之士議在不辱
而顯等恃恩敢行侮慢臣時列啓并呈顯言事
事寢不省是以自來拱嘿未敢多言而切見國
法日侈而恩宥無已誠懼威禁遂頽醜聲滋聞
愚謂自今宜齊之以法使下知禁有司所執猶
宜時聽不然以往則監司之吏鋒鉅靡加而準

繩替矣臣忝切非據與聞國政服事以來荏苒
三年朝憲多違威御無列好問不登而流聲播
越皆由執政之臣官非其人常思收迹自替以
避賢路退惟受遇微報未効是以忍垢素餐敢
用文諫唯殿下哀明愚臣纒纒愚臣不以前後
干迕多見罪責臨紙慷慨言不自盡

陸士龍文集卷第九

陸士龍文集卷第十

晉清河內史陸

雲

士龍

書集

與朱光祿書

與張光祿書

三首

與嚴宛陵書

與宛陵荅

與戴季甫書

與楊彥明書

七首

與陸典書書

車茂安書

荅車茂安書

車茂安又荅書

弔陳求長書

弔陳伯華書

移書太常府薦張瞻

與朱光祿書

少長之禮教化所崇中葉陵遲舊章廢替追惟前訓思遵在昔敢慕高義謹奏下敬

與張光祿書

三首

長幼之序人倫大司季世多難失敬在昔敢希令典求思自邁謹奏下敬以藉虔欵

顧令文彥先母宣隆眷彌泰之惠懷德惟慙守以反側旣晞仁風委心自昵加與沛君分同骨肉憑賴之懷疑心如結

加蒙顧遇重以傾倒唯亮歸誠石行文敦素篤邃道實茂淑器敏旣美思學又快南州良德今者東行望風自託其意繾綣願厚接納副其乃心

與嚴宛陵書

少長之序禮之大司晚節陵替舊章殘棄瞻言典旣慕欵承仰憑高風實副邦民謹奏下敬以藉虔欵思復未遠庶免悔吝

嚴宛陵荅

奉詠美旨流風緝遠復禮興仁命世之作獲尚齒之况無尊賢之報抱此永懷愧歎何有君子

弘道厚文無施是用釋筆歸于神要

與戴季甫書七首

雲頓首頓首惟夏始暑願府館萬福疾病處遠
人信希少情問闕替中間曠年瞻慕敬想興言
反側隆敦比辱慰誨銜抱豐眷以增愚迹不勝
勤企謹及君之書不以備

陸雲頓首頓首曠遠以來忽踰年載宗想輝蔭
引領惟慕東歸之後疾患增瘵且道路悠遠不
值信便久念自修而經年不果雖在伏枕至於
結心注望實係光塵累蒙誨命舊眷惟新執

之曰如或面展長塗自替聽誨未由瞻企勤戀
守以委重表不且今更繼情季鸞公世相係徂
落俊德茂業邦家之彥一朝並逝求爾淪沒哀
痛切裂不能自勝柰何柰何江南初平人物失
叙當賴俊彥彌縫其闕加在二賢楚國之良沉
寶積實未童大朝重惟痛恨言增哀咽誠念仁
風篤烈如在疇昔意愛所隆嗟悼之心誠不可
言備蒙其分情兼切傷加承仁誨益以惻愴
武陵於荊州云多人士聞周孟子伍令明潘世
長諸人並為美德心常依依今日遭遇良驥展

士之秋也不審達者凡有幾人無因聽承誨語
咨稟未聞每懷勤企表不盡言

長游前下停此十餘日想德欣喜無以爲喻分
別恨恨于今戀之當暑遠涉益追心懸清粹沈
茂懇敏通微居德履道秉心真實貴一時良彥
君之別久見之懽察風姿美令心神烈暢已成
美器欽愛之情欵然至實近聞若思未有通塗
每用於邑

周安東昔奄薨徂追慕切剝不能自勝勲業有
究早爾背世遺惠鄙州民物同哀備記名義情

兼切列衣在此會同每言高重武陵至心欵列誠
念篤終必垂悽愴王季揚孝友行素旣簡清塵
在此接近備其所顧居心秉尚用志不苟公私
操實足爲美器今爲上斷品還此郡前群小虛
妄遂下其編牒爲之憤歎人物遠主彝倫多失
願垂末光益有以潤區區至心謹復言意戴彥
遠永昌猶爲遠小想其必有惠政耳

郭敬言蒸陽良才遠負爲之邑歎以其姿望足
以致高想不久爾耳石行文在無錫大有清積
一州之高功長吏此家行素道實州閭所稱疇

昔接事既盡其才願重榮益以成其實凡在羽
埃思附鳳翼風塵所集無不拭目

與楊彥明書 七首

雲白欽明去書不悉彥先來得書以爲慰時去
苒荏歲行復半悲此推移終然何及漸已欲熱
想自如常悠悠守限良談未日眇然東望思以
叙至及反憤罔不多行矣愛德往來相聞

陸雲白省示累紙重存往會益以增歎年時可
喜何速之甚昔年少時見五十公去此甚遠今
日冉冉已近之已耳順之年行復爲憂歎也柯

生而多悅樂春未馱秋風行戒已悲落葉矣人
道多故懽樂恒乏教遊此世當復幾時各爾永
鬲良會每闌懷想親愛寤寐無忘書無所悉

彥先來相欣喜便復分別恨恨不可言階塗尚
否通路今塞令人罔然名論允進遠而有光者
度此顯期不淹民望耳塵堂之士比迹山歎栖
者悲豈唯一人少明湘公亦不成遷名公之舉
且可以爲資然今恨恨當行行復有宜耳

彥先相說疾患衛欲增廢深爲怛然行向襄篤
疾來應百年之望雖未必此爲疑然親親所以

相卹之一感耳想懃服藥行復向佳耳吾既常
羸間來體中亦恒少賴曰爾勿勿則堪自力未
速待罪會期難尅情之戀想何勞之多好自愛
屢相聞

行言竟行令人恨之已當至未耶能少留不世
明篤行至性如前後所論語其偶爾旋已能悟
耳而聞其遂於愬其使愕然寧以所不可虧一
國之清格乎輒便絕意彥先所一二
載會稽如是便發分別恨然一得名士唯當有
此君耳失分重勞令人歎息善得日夕真家人

若思望之清才後類一時之彥善並得接九月
中可得達東禮衡陽長沙甚快東人近未復有
見叙者公進屈父恒爲邑固黨方有清塗薄國
讓在內中大有好稱此家一時美德也在事又
佳甚快甚快

永耀已葬冥冥遠矣存想其人痛切肝懷柰何
柰何聞伯華善佳深慰存亡人生有終誰得免
此且使繼嗣克勝堂構有紹亦存亡願也明
類喪索同好日盡如此生輩那可復多耶臨書
酸心

與陸典書書 七首

雲再拜自曠但爾已復經時限制長路惟親未
期嗔近晨風傾阮結言來誨網繆篤眷彌隆誦
玩千周以富侍會辭言莫瞻翹翹仰慕大人泥
愛在我尤弘每銜思戀何時去心限此省省願
言用替遲瞻靈立感時情傷往來信理自更繼
情如有信唯不玉音

雲再拜侍郎比信數會同邪常憶戀此君不慙
有殞此君公私並憎年長而志新齒邁而曾勤
家宗美者也常感其篤分封之始年相見重達
其至心

雲再拜日月運邁何一流速銜哀經變思愈深
亡靈處被黃塘幽曠在遠之億心常愴裂含痛
靡及悠悠柰何想時時復一省視思至心破無
所厲情叔父一兄故尚未達想不久至耳深憂
徙際公私哀罔曠離山墓永適異國四時靈寂
桑梓靡循且念親各爾分析情感復結悲嘆而
已知大人每垂郵逮也臨表悲猥絕筆餘哀不
知所次雲再拜

每念彥先情兼剝裂年盛志美令姿可借舉言

及不知心傷也

雲再拜國土之邦實鍾俊哲太伯清風遯世立德龍蛟東嶽三讓天下化垂邁迹百代所晞高蹤越於先民盛德稱乎在昔續及延陵繼嚮馳聲沉淪漂流優遊上國所音察微智越衆俊通幽暢遐明同聖荷言偃昭烈於孔堂貞武邁功於諸侯自秀偉相承明德繼踵亦爲不少吳國初祚雄俊尤盛今日雖衰未皆下華夏也來誨所及遐邇同懷重及二聖下逮衆子或生羗狄或在邊域勲美之隆實如嘉誨愚以東國之士無所立退無所守明裂背苦皆未如意雲之鄙姿志歸丘壟草門閨窬之人晞天望之冀至於詔季禮之遐蹤結高肝於中夏光東州之幽味流榮勲於朝野所謂闕管以瞻天緣木而求魚也重申不烈雲再拜

雲再拜每惟夫人挺自然之妙質稟淵姿之弘毅克壯其烈兼誅之道希文尚武潛居以娛其志靜處以育其神遊步八素之林道遙德化之園豈如未者牽曳燥燥世道通明俊又在官焉使晞世之寶久隱岑嶮之山逸景之迹永繫幽

真之坂方將車乘田綸束帛箋箋排金風於太
微跨天路以妙觀恢皇綱之大烈榮祚乎祖
宗此乃大人之所宜循非凡夫之可企望也無
因親展書以言心心之所積萬不叙一雲再拜
雲再拜臣鄉前行陵有小事唯以具聞事已大
了猶以爲願行欲取歸念別方至豫以愍然每
相見未嘗不以大人爲言想令仁士先令遠公
然兄弟屢數常存思想想令遠分好已爲綱因
彥恩復蒙誘掖耳無因觀對言不盡心屢垂
誨以慰遠思雲再拜

雲再拜臣卿在臺高譽洋溢洛邑之內無不欽
敬東南之貴寶真不但會稽之篠蕩也每會常
共歌詠信無一面不歎吟也想方周旋携手散
今日之恩耳雲再拜

雲再拜輒宣來意仲應此家大自欽重大人黨
已見其意耳

雲再拜不知從事今在州得假歸耳想今來得
行有綵侍面耳每得令遠書感賴豐化言歸于
歎來誨恤及亦爲無已情深欣如云在身年歲
及人名聞難集非賴師友何以自濟願敦惠助

爲之光輔臣仁在此華亭之望以大人爲宗主
宜令小大得分亦崇洪業也雲再拜

附車茂安書

永白間因王弘季有書恠足下無荅外甥石季
甫忽見使爲鄮令除書近下因令便道之職得
此罔然老人及姊自聞此問三四日中了不能
復食姊晝夜號泣不可忍視外甥之中老人真
自受恤季甫恒在目下卒有此役舉家慘感不
可深言昨全伯始有一將來是句章人具說此
縣既有短狐之疾又有沙颶害人聞此消息倍
益憂慮如其不行恐有節目良爲愁憤足下可
具示土地之宜企望來報車永白

荅車茂安書

雲白前書未報重得來况知賢甥石季甫當屈
鄮令尊堂憂灼賢姊涕泣上下愁勞舉家慘感
何可爾耶輒焉足下具說鄮縣土地之快非徒
浮言華艷而已皆有實徵也縣去郡治不出三
日直東而出水陸並通西有大湖廣縱千頃北
有名山南有林澤東臨巨海往往無涯汜船長
驅一舉千里北接青徐東洞交廣海物惟錯不

可稱名過長川以爲陂燔茂草以爲田火耕水
種不煩人力決泄任意高下在心舉鉞成雲下
鉞成雨旣浸旣潤隨時代序也官無逋滯之穀
民無飢乏之慮衣食常充倉庫恒實榮辱旣明
禮節甚備爲君甚簡爲民亦易季冬之月牧旣
畢嚴霜墮而蒹葭萎林鳥祭而罽羅設因民所
欲順時遊獵結罝繞堙密岡彌山放鷹走犬弓
弩亂發鳥不得飛狩不得逸真光赫之觀盤戲
之至樂也若乃斷遏海浦隔截曲隈隨湖進退
采蚌捕魚鱸鮪赤尾鯪齒比目不可紀名鱠鱠

鱖炙鯁鮓燻石首臠鯊鯨真東海之俊味肴膳
之至妙也及其蚌蛤之屬目所希見耳所不聞
品類數百難可盡言也昔秦始皇至尊至貴前
臨終南退燕阿房離宮別館隨意所居沉淪涇
渭飲馬昆明四方竒麗天下珍玩無所不有猶
以不如吳會也鄉東觀滄海遂御六軍南巡狩
登稽嶽刻文石身在鄧縣三十餘日夫以帝王
之尊不憚爾行季甫年少受命牧民武城之歌
足以興化桑弧蓬矢丈夫之志經營四方古人
所嘆何足憂乎且彼吏民恭謹篤慎敬愛官長

鞭朴不施聲教風靡漢吳以來臨此縣者無不
遷變尊大夫賢婦上下當爲喜慶歌舞相送勿
爲慮也足下急啓喻寬慰真說此意吾不虛言
也停及不一一陸雲白

車茂安又荅書

永白即日得報披省未竟懽喜踴躍輒於母前
伏讀三周舉家大小豁然忘愁也足下此書足
爲典誥雖山海經異物誌二京南都殆不復過
也恐有其言能無其事耳雖爾猶足息號泣懽
忭笑也府君入後月當西出足下可豫至界上

吾欲先一日與卿相見也荅不復多車永白

弔陳永長書 五首

雲頓首頓首哀懷切恒賢弟永曜早喪俊德酷
痛甚痛柰何陸士龍頓首頓首

雲頓首頓首天災橫流禍害無常何圖永曜奄
忽遇此凶問卒至痛心推剝柰何柰何想念篤
性哀悼切裂當可堪言無因展告望企鯁咽財
遣表唁悲猥不次雲頓首

永曜茂德遠量一時秀生竒蹤瑋寶灼爾凌群
光國隆家人士之望冀其永年遂播盛業携手

退遊假樂此世柰何一朝獨先彫落奄聞凶諱
禍出不意拊心痛楚肝懷如割柰何柰何豈况
至性何可爲心臨書鯁塞投筆傷情
與永曜相得便結願好契闊分愛恩同至親憑
烈三益終始所願中間離別但爾累年結想之
懷夢寐何圖忽爾便成永隔哀心慟楚不
能自勝痛當柰何柰何義在奔馳牽役萬里至
心不叙東望貴舍雨淚沾襟今遣吏并進薄祭
不得臨哀追贈切裂幸損至念書重不知所言
永曜素自強健了不知有此患險戲之災遂不
可以言知酷楚而已

弔陳伯華書

七首

可救豈惟貴門獨喪重寶此賢之殞邦家以
情分異他痛心殊深已矣遠矣可復柰何追想
遺規不去心目悠悠無期哀至裴裂不知何言
大君遠資高數世之瑰瑋當光裕大業茂垂勳
名柰何日朝早爾喪墜自聞凶諱痛心割裂追
惟哀摧肝心破剝痛當柰何柰何相念夙年奄
嬰哀艱扳慕不及當可爲心牽役遠路無因奔
馳東望靈宇五情哽咽割切哀慕書重感猥不

次

昔與大君分義歎篤彌隆之愛恩加兄弟憑此
烈好要以始卒何圖大君獨先早世遠聞訃問
若喪四體拊心慟楚肝心如割柰何柰何豈况
至性當何可言今遣吏恭集薄祭不得臨喪以
叙悲苦計往人到貴舍之日揮涕而已投筆獻
款

移書太常府薦張瞻

蓋聞在昔聖王承天御世殷薦明德恩和人神
莫不崇典謨以教思興禮學以陶遠是以帝堯

昭煥而道協人天西伯質文而周隆二代大晉
建皇崇配天地區夏既混禮樂將庸君侯應歷
運之會贊天人之期博延俊茂熙隆載典伏見
衛將軍舍人同郡張瞻茂德清粹器思深通初
慕聖門棲心重仞啓陸及階遂升樞奧抽靈匱
於秘宮披金滕於玄夏思樂百氏博採其珍辭
邁翰林言敷其藻探微集逸思心洞神論道屬
書篇章光覲含奇宰府婆娑公門棲靜隱寶淪
虛藏器聚裳襲錦衣被玉曹泉攻路懸車將
邁考槃下位歲聿屢遷縉紳之士具懷儉恨方

今太清闕宇四門啓籥玄綱括地天網廣羅慶
雲興以招龍和風起而儀鳳誠巖穴耀穎之秋
河津託乘之日也而瞻沉淪下位群望悼心若
得端委太學錯綜先典垂纓玉階論道紫宮誠
帝室之瑰寶清朝之偉器廣樂九奏必登昊天
之庭韶夏六變必饗上帝之祀矣

陸士龍文集卷第十



